

Pelajar UMS ikuti bengkel penulisan

UM 29-02-2012 26

KOTA KINABALU 28 Feb. - Seramai 48 pelajar Program Sains Sukan Fakulti Pendidikan dan Pembangunan Sosial bersama 100 mahasiswa dan pegawai Universiti Malaysia Sabah (UMS) mengikuti bengkel Penulisan Kewartawanan dan Penerbitan Buletin UMS di sini baru-baru ini.

Pensyarah Sains Sukan UMS, Mohamad Nizam Nazarudin berkata, penganjuran bengkel dua hari itu bertujuan mengasah bakat di kalangan mahasiswa untuk menceburi bidang penulisan dan kewartawanan.

Katanya, selain membuka peluang menerokai bidang penulisan dengan lebih baik, bengkel tersebut mampu menjadikan mahasiswa program Sains Sukan mempunyai tanggungjawab untuk membangunkan sukan negara.

Menurutnya, peserta yang menyertai program tersebut boleh menggunakan kemahiran masing-masing untuk mengetengahkan sukan kepada orang ramai dan memartabatkan sukan di persada lebih tinggi.

“Di sinilah mahasiswa boleh menimba ilmu penulisan dengan sebaiknya dan memanfaatkannya untuk menyemarakkan lagi sukan di negara ini, malah mampu menjadikan mereka seorang penulis sukan terbaik di masa depan,” katanya pada majlis penutup bengkel tersebut di sini baru-baru ini.

Bengkel Penulisan Kewartawanan dan Penerbitan Buletin tersebut merupakan anjuran Bahagian Kebudayaan dan Kesenian, Jabatan Hal Ehwal Pelajar UMS.